

CAÇA CHE DIRUN SAN PA_BLO, DECHUH YE YAHN IH_YAN YAHN DENDIOHS CHE VATE YE YA_N GALACIA

1 ¹U Pa_blo ne, ndiyu ihyan iyehanse che chihco ye vederihquentiyon t_ah che co apóstol, te a Dihvo vo Jesucristo ma_n, Dendiohs Chida, ihyan min che ndedetuhche ye Dihvo vo va_n ten_ahn ma_n. ²Nchuhn che ritahno ne Dihvo vo Jesucristo, che vate ne ya_hn yahn Galacia, u nduco nducoya_ça dihno vo che chenán ye muhn nducó, dirún nuhn ca_ça cuh, dechuh nuhn yahn ne.

³Dendiohs Chida ma_n, Dihvo vo Jesucristo ma_n, din yahino ye nchuhn, din ye che nda_h_ça cuahtenan ne. ⁴A Dihvo vo Jesucristo che chihco menda_hn ye ihyan chih ye ca_ça nunde yuhn vo, ndedevahn ye uvo va_n ihyan nunde nduh_ça che nahn Chido vo Dendiohs, ⁵ihyan min che va che ndeva nducoya_ça ihyan yavena_n ye numacuahn ro. Tih_ça co.

Va a_ma na_n no ndudo ca_ça che ndevahn ihyan

⁶A_ma rahn inó che nduco nun raconda_h vedame nchuhn Dendiohs, ihyan min che tenda_hnun ye uvo, dechuh ye Dihvo vo Jesucristo che yahino ye uvo. Ma_n ne, riquendi ne ta_ma na_n ndudo. ⁷Ndiyú che va ta_ma na_n ndudo ndah, ate che tahque ri ne, vate ihyan che redetohnan ye ino nchuhn, nahn ndacorun ye ndudo ndah yahn Dihvo vo Jesucristo.

⁸Adecoduhno ihyan che cuahndudo ye ta_ma na_n ndudo che ndiyu ndudo che rahndudo nuhn, rihnevan nchuhn ne, ihyan

min ne, va che conda ye, andahre u o ama ángel che caça ye vahchetero. ⁹Nduhca che chicuáhn nchuhn ro menan ne, man ne, ndaconan ntihyon yán tama yune. Adecoduhno ihyan che cuahndudo ye tama nan ndudo che ndiyu ndudo che a chitahno nchuhn ne, ihyan min ne, va che conda ye.

¹⁰U ne, hua rinúhn che co yeno ihyan iyehhse nducó, te che rinúhn ne, che co yeno Dendiohs. Ndete che núhn che co yeno ihyan iyehhse nducó ne, nde hua co conán nan ntihyon yahn Dihvo vo Jesucristo.

¹¹Dihnó, nahn che codevano nchuhn te ndudo ndah che cahndudó, chihnevan ne ne, ndiyu vededevano yahn ihyan iyehhse, ¹²te nde ama ihyan iyehhse ne, hua chicuahn ye u. Che rahndudó ne, man Dihvo vo Jesucristo te ye, checadinó.

¹³A checadino nchuhn nduhca ihyan u ro menan cuahn che chitahnó dama nduco ihyan nación yahn Israel. Din tán nduco ihyan yahn Dendiohs, rihcó che decuihnó ihyan. ¹⁴Nduhca che ritahno ihyan nación yáhn Israel ne, u che tahque quendahnán che co nducoyaca combiero yáhn, te numa inó quendí costumbre yahn ihyan ndico yáhn. ¹⁵Ate Dendiohs ne, tendahnun ye u numacuahn vedeyahino yahn ye, ne chihco vih ye u nde ro che metah cuhndeyán. ¹⁶Nda ro che nahn ye ne, dechuh ye Daya ye nán, te cuande ye ndudo yahn ye u caça che cuahndudó van ihyan nación chenahn. Cuahn che tihca chi ne, hua cháhn chiqueruné nde ama ihyan, ¹⁷nde hua cháhn yan Jerusalén chendihcheró ihyan che tahque menan ndi ye apóstol che co u. Tahque ndah ne, cháhn yahn yahn Arabia. Chihno min ne, ndaconán yan Damasco.

¹⁸Nde chihno ino nduyo ne, tuhme cháhn yan Jerusalén che ndihcheró Pedro, ne quenán nduco ye ntihyon ro.

¹⁹Atenan ihyan min nduco Jacobo, dihno Dihvo vo Jesucristo, ndihcheró ihyan. Hua ndihcheró ihyan apóstol chenahn.

²⁰Nde nan Dendiohs ne, ndudo cuaco che dirún yahn nchuhn.

²¹Adiva ne, cháhn yahn yahn Siria man, yahn yahn Cilicia man. ²²Tahn min ne, dihno vo che ritahno ye Dihvo vo Jesucristo, che vate ye estado yahn Judea ne, hua rendihche ye u. ²³Che devano ye yáhn ne, atenan che rente ihyan che a u che din tán ro menan me nduco ihyan che ritahno ye Dihvo vo man, che rahndudó ndudo che rihcó che decuihnó ro menan me man, ²⁴ne rendeva ye yavenan Dendiohs cavá.

Pablo ne, nevahneacun ihyan apóstol chenahn ihyan

2 ¹Chihno ndichecun nduyo ne, chahn tama yune yan Jerusalén nduco Bernabé, ne quendá Tito. ²Chahn, te checadinó te tihca nahn Dendiohs. Min ndo dama deman ihyan che ndinan ye yahn yaco, ne necah cuandé ihyan yahn ndudo ndah che rahndudó van ihyan nación chenahn. Tihca dín, te nahn cadinó deh cahma ye yahn ntiyon yahn, a cochihve o hua. ³Nde Tito che nduco se u, andahre sahn tama nación se, ate hua din ye fuerza che conan seña sahn. ⁴Ama o sahn che redin ca se che ritahno se Dihvo vo Jesucristo ne, cuahn ndeh chenda se min, rano se nuhn, nahn cua cuande se nuhn dehco che vatemán ino nuhn, ritahno nuhn Dihvo vo Jesucristo, te nahn se che ndaconan quendi nuhn ley che dirun Moisés, din che denduh ino nuhn. ⁵Ate nde tah hua tumacah nuhn yahn sahn chahn, te rendedecadino nuhn cava nchuhn, ne hua cah yune nuhn che tihdenan se costumbre ndico nan ndudo ndah yahn Dihvo vo Jesucristo.

⁶Me ihyan ndinan chahn ne, a ndinan ye o hua, chemin ne, nde hua cuande yahn, te Dendiohs ne, dama no rendihche ye nducoyaca ihyan. Ihyan chahn ne, metah nde ama nan ndudo che quendudonan devano ye che va che cacuahn ye u. ⁷Tahque ndah ne, tumacadino ye che man Dendiohs nahn ye ntiyon u che cuahndudó ndudo ndah yahn Dihvo vo Jesucristo van ihyan nación chenahn nduhca che nahn ye Pedro che cuahndudo ye van ihyan nación yahn Israel. ⁸Nduhca che cah dito Dendiohs Pedro nan ntiyon van ihyan nación yahn Israel ne, tihca cah dito ye u nan ntiyon van ihyan nación chenahn. ⁹Jacobo man, Pedro man, Juan man, ihyan chahn che ndinan ye, nducote tumacadino ye te numacuahn vedeyahino nte Dendiohs vederihquentiyon u ne, nevahneacun ye nuhn, u nduco Bernabé, ne nte cade ye che quendi nuhn cuahndudo nuhn van ihyan nación chenahn, ne man ye ne, quendi ye cuahndudo ye van ihyan nación yahn Israel. ¹⁰Atenan che chica ye nuhn ne, che din nuhn cuande cava ihyan chevah che vate ye min. Chemin ne, numacuahn vedeyeno dinahn.

Pablo ne, yahve ye Pedro min yan Antioquía

¹¹Adiva cuahn che chahn Pedro yan Antioquía ne, tumacadinó che hua runecade ye, ne quenana cuma che

yahvé ihyan. ¹²A menan ne, reh ye dama nduco ihyan nación chenhahn. Ate cuahn che nda ama o sahn che dechuh Jacobo ne, din vih ye, ametah cheh ye dama nduco ihyan chahn, te vah ye ihyan che riquendi ye redinahn ye ley che dirun Moisés. ¹³Nduco chemin ne, chihco ro ye che o nan o chende ye, ne nducoyaca ihyan nación yahn Israel che rendo dama ye min, nde Bernabé ne, dama chi ye nduco ye. ¹⁴Che tihca din ye ne, chihnde ro yahn ye che hua runecade riquendi ye ndudo ndah yahn Dihvo vo Jesucristo. Chemin che rahn ri Pedro nan nducoyaca ihyan ndiyaco: “Di, che sahn nación yahn Israel di, a metah ro che dama ri nduco dihno vo ihyan nación chenhahn, chihcoman costumbre yahn ihyan nación yehn. Man ne, ztaca che nahn din fuerza dihno vo ihyan nación chenhahn che dinahn ye costumbre yahn ihyan nación yehn?”

Ihyan nación yahn Israel man, ihyan nación chenhahn man, che ritahno ye Dihvo vo Jesucristo ne, ndevahn ye

¹⁵Nuhn ne, ihyan nación yahn Israel nuhn, ndiyu ihyan nunde nuhn nduhca ihyan nación chenhahn. ¹⁶Ate devano nuhn che atenan che cotahno vo Dihvo vo Jesucristo che ndeva Dendiohs uvo, ndiyu che dinahn vo ley che dirun Moisés. Chemin che nahn nuhn ne, cava che ndeva Dendiohs nuhn ne, ndotenan che dinahn nuhn che rihquentiyon ley min ne, chitahno nuhn Dihvo vo Jesucristo. Tihca din nuhn, te andahre dinahn ihyan che rihquentiyon ley min, ate hua cava chemin ndeva Dendiohs ihyan.

¹⁷Man che a chitahno nuhn Dihvo vo Jesucristo, che nahn nuhn che ndeva Dendiohs nuhn ne, ndete che quendah ro yahn nuhn che ihyan nunde nuhn nduhca ihyan nación chenhahn ne, za cahquino vo cahmo vo che Dihvo vo quendihco ye nunde ne? Hua. ¹⁸Ama te a chihcoman nuhn ley che dirun Moisés ne, ndete che ndaconan nuhn dinahn nuhn che rihquentiyon ne, nduco chemin cahco ro nuhn che ihyan nunde nuhn. ¹⁹Cuaco che tihca, te u ne, a nan ley min tumacadinó che hua ndaca vederenchahco che dinahn vederihquentiyon yahn man, che tahque ndah cochahtinó Dendiohs man. ²⁰Anduhneca ndete che quenan yah dama nduco Dihvo vo Jesucristo, ihyan min che Daya Dendiohs. A

ihyan min che rihquentiyon ye u, ndiyu mán. A yahino ye u, ne chihco mendahn ye ihyan chih ye cavá. Mán ne, nducuahñ che redín ne, a yahn che ritahnó ihyan. ²¹Ndiyu che duche rinó vedeyahino yahn Dendiohs, ate hua co ndeva ye ihyan cuande yahn che dinahn ye ley che dirun Moisés, ne chemin che quenan cuma che chih Dihvo vo Jesucristo.

Che ritahno vo Dihvo vo Jesucristo ne, hua redotenan vo ley che dirun Moisés

3 ¹Nchuhn dihnó che vate ne yan Galacia, a te cuande ndah nuhn nchuhn ndudo yahn Dihvo vo Jesucristo, ihyan min che quenan yah ye. Ate mán ne, ama tundo ndacondá ne, chitahno ne yahn ihyan che chihñcheh ye nchuhn, chihcomán ne che redinahñ ne ndudo cuaco. ²Nahn che cuahte nchuhn ndedecadino ne. ¿A te Dendiohs Vaco Ndah yahn ye nchuhn yahn che dinahn ne ley che dirun Moisés, o te ye yahn che chitahno ne ndudo ndah yahn Dihvo vo Jesucristo? ³Hua co nchuhn chevah ca tundo. A quenun Vaco Ndah yahn Dendiohs nchuhn yahn che chitahno ne, ne hua ndahca che ndevañ ne richahtino ne ley min. ⁴Ndete che cahcomán nchuhn ndudo ndah yahn Dihvo vo Jesucristo ne, nde ama ñan dehtenduh che a din Dendiohs nduco ne, hua cochihve yahn ne. Ate quenan inó che cochihve yahn nchuhn. ⁵Cuahñ che redin Dendiohs che renun Vaco Ndah yahn ye nchuhn, rinahn vederihno van ne ne, ndiyu cava che redinahñ ne ley che dirun Moisés, te cava che ritahno ne Dihvo vo Jesucristo.

⁶Cua cuande ne nduhca che chinahn nduco Abraham. Ihyan min ne, chitahno ye Dendiohs, ne cava chemin no che nedin yahn Dendiohs ihyan. ⁷Cuedevano nchuhn te nducoyaca ihyan che ritahno ye Dendiohs ne, riquendi ye yune yahn Abraham. ⁸Nde a rahn me ne, a ndirun ñan Ndudo yahn Dendiohs te ihyan nación chenahn che cotahno ye ne, nedin yahn Dendiohs ihyan. Ndudo ndah min ne, a ndudo che cah Dendiohs Abraham, rahn ye tuhca: “Vedeyahino che quenan cumá ndoque ne, a namin che ndah yahn ihyan nducuahñ nación.” ⁹Nducote tihca ne, nducoyaca ihyan che ritahno ye ne, nedin yahn Dendiohs ihyan nduhca che nedin yahn ye Abraham yahn che chitahno ye.

¹⁰Me nducoyaca ihyan che richahtino ye che ndevahn ye nduco che dinahn ye ley che dirun Moisés ne, va che conda ye, te nde ama ihyan hua cocha ye dinahn ye ley min. Va che conda ye, te a ndirun nan Ndudo yahn Dendiohs tuhca: “Nducoyaca ihyan che hua dinahn ye nducuahn che ndirun nan ley ne, va che conda ye.” ¹¹Nducote tihca ne, a ndero ndi che nde ama ihyan hua tuno ye nan Dendiohs nduco che dinahn ye ley min. A namin no tun ndirun nan Ndudo yahn Dendiohs tuhca: “A ihyan che ritahno ye che ndedevahn Dendiohs ihyan, ndeva ye ihyan.” ¹²Ate hua tihca ley che dirun Moisés, te chemin ne, rihquentiyon che dinahn ihyan ndiyu che cotahno ye. Chemin ne, a ndirun nan ley min tuhca: “Ihyan che dinahn ye nducuahn che rihquentiyon ley cuh ne, ndevahn ye.”

¹³Dihvo vo Jesucristo ne, a ndedevahn ye uvo, metah che conda vo nduhca che rihquentiyon ley min. Man ye chuhrihn ye menun vo, chi ye ye castigo che va che co vo. Chinahn nduco ye nduhca che a ndirun nan Ndudo yahn Dendiohs tuhca: “Nducoyaca ihyan che a ndinda ye ne, renan yah ye.” ¹⁴Nduco tihca ndedevahn ye uvo cava che din ye che conahn ndudo che necah Dendiohs Abraham cava che ndah yahn ihyan naci6n chenahn. Namin nduco tihca ne, nducoyaco vo che ritahno vo ne, conun Vaco Ndah yahn Dendiohs uvo nduhca che a cah ye ndudo yahn ye.

¹⁵Dihn6, cua cuande nchuhn ejemplo cuh che ntihiyon yan: Cuahn che redendah ihyan ama caa, redin ye firma, rihco ye ne, nde ama ihyan hua co cahca tan ye yahn, nde hua co ndedendah ye nduhca che nahn ye. ¹⁶Me ndudo yahn Dendiohs che cah ye Abraham nduco ndata yahn ye ne, che ndirun che ndata yahn ye ne, conahn che ama no ihyan nan ndata yahn ye, ndiyu nducoyaca ye. Ihyan min ne, a Dihvo vo Jesucristo. ¹⁷Cuedevano nchuhn te Dendiohs ne, cah ye ndudo yahn ye Abraham, ne cah dito ye. Me ley che dirun Moisés chihno cun ciento ndico ndiche nduyo adive ne, hua co che cahca tan yahn ndudo min. ¹⁸Che cah Dendiohs ndudo yahn ye Abraham che din ye che ndah nduco nducoyaca ihyan ne, conahn nduco ye yahn che tihca chi yeno Dendiohs ndiyu yahn che dinahn ye ley min.

¹⁹Nducote tihca ne, co vate ihyan che ndedecadino ye: “¿Dehra cochihve ley che dirun Moisés tuhme ne?” Cuedevano

nchuhn te chihnde adiva atenān cava che chihco ro nunde yahn ihyān nde ndā ro che nan ndata yahn Abraham quendāh ihyān min che a nente cāde Dendiohs nduco Abraham yahn ye. Dechuh Dendiohs ángel, ndāhco ye ley min tah Moisés cava ihyān yan. ²⁰A ndero ndi che chichihve Moisés yahn Dendiohs mān, cava ihyān yan mān. Namin a ndero ndi che Dendiohs che cāh ye ndudo yahn ye Abraham ne, a ihyān min no tun che ndāhco ye ley yahn ye tah Moisés. ²¹Andahre tihcā, ate ley yahn ye che ndāhco ye tah Moisés ne, ndiyu che rendāhco cāde ye ndudo che cāh ye Abraham, te hua nedin yahn ye ihyān, ndevahn ye nduco che dinahn ye ley min. ²²Tahque ndah ne, rihco ro ley min che va che conda nducoyaca ihyān, din nunde yahn ye. Tihcā rihco ro ley min cava che ihyān che cotahno ye Dihvo vo Jesucristo ne, ndeva Dendiohs ihyān, nduhcā che a necāh ye ndudo yahn ye.

²³Numanahn che metah ndā Dihvo vo Jesucristo, cotahno vo ihyān ne, chihco rino ley min uvo. ²⁴Anduhnecā ndete che din ley min cudādo uvo, tihyon yune uvo cava che cotahno vo ihyān min, nedin yahn Dendiohs uvo. ²⁵⁻²⁶Ate mān che a nedin daya Dendiohs uvo yahn che ritahno vo Dihvo vo Jesucristo ne, ametah rendotenan vo ley min. ²⁷Nducoyaco vo che chedenune vo, nevahnecon vo Dihvo vo Jesucristo ne, ndo vo ihyān yahn ye. ²⁸Mān ne, nde hua redin yahn che ndāhchenan vih vo. Dehve din yahn atānochan ihyān yahn ye, a ihyān nación yahn Israel ye, o ihyān tāmā nación ye, a redin ye ntiyon yahn ihyān, o redin ye ntiyon yahn mān ye, a ndāhta ye, o chāhn ye. Hua dehve din yahn tāchan vo, te che ndichahno vo Dihvo vo Jesucristo ne, a dāma no nducoyaco vo. ²⁹Nducote a yahn Dihvo vo Jesucristo uvo ne, riquendi vo yune yahn Abraham, ne ndeva Dendiohs uvo nduhcā che a necāh ye ndudo yahn ye.

4 ¹Cua cuande nchuhn tāmā ejemplo: Ama sahn dihn che va che ndondā tah se vedecuihca yahn chida se ne, numanahn che lihn ca se ne, rendihche ihyān sahn anduhnecā mozo, andahre sahn min co yahn se nducuahn. ²Va ihyān che redin ye cudādo sahn mān, rendihche ye cava se mān, nde ndā ro che ndāhco chida se dehtenduh yahn ye tah se. ³Atihnocā uvo, te ro che metah cotahno vo Dihvo vo Jesucristo ne, anduhnecā checāhya uvo, riquendi vo

costumbre yahn ihyan ndico yuhn vo. ⁴Ate cuahn che tuno ro che a ndihco cãde Dendiohs ne, dechuh ye Daya ye. Ihyan min ne, ndo ye ihyan iyehñse, chihñdeyan ye, ne dinahn ye ley che dirun Moisés, ⁵cava che nduco tihcã ndedevahn ye uvo yahn vederihquentiyon yahn ley min, ne nedin ðaya Dendiohs uvo. ⁶Mã che a nedin ðaya Dendiohs uvo ne, dechuh ye Vaco Dihvo vo Jesucristo, ihyan min che Daya ye, conun chete chedave yuhn vo, ne covãh tuhcã: “Ndiñ che Chidã.” ⁷Nducote tihcã ne, a ndero ndi che ndiyu ihyan vane uvo. A ndevahn vo, nedin ðaya Dendiohs uvo, ne ndeva ye uvo yahn che ritahno vo Dihvo vo Jesucristo.

Pablo ne, rendedecadino ye cava ihyan che ritahno ye Dihvo vo Jesucristo

⁸Ro menã me ne, vatechica vane nchuhn ñan Dendiohs, nde hua devano ne che va ye, rendeva ne yavenã dehtenduh che ndere redin ne dendiohs yahn ne. ⁹Ate mã che a nevahnecun ne Dendiohs, nedin yahn ye nchuhn ne, çtaçã che ndaconan ne dinahn ne costumbre chemin chan che nde hua cochihve? ¹⁰Nchuhn ne, renevahnecun ne dehtenduh vihco mã, rihco vih ne iyo mã, nduyo mã, che rahco ne che cahnda. ¹¹Rendedecadinó che a chinda ntiyon che dín van ne, chicuáhn ndudo ndah yahn Dihvo vo Jesucristo nchuhn.

¹²Dihno, nducote ðama chi vo nduco vih ro menã me ne, ricã nchuhn che quendi ne yune yãhn, cahcomã ne costumbre ndico nduhcã che a chihcomã. Quenan inó che dinahn ne che ricã nduhcã che din ne ro menã me. ¹³A devano nchuhn te yahn che chi cáh, che quenã yan vaco ne, ne chemin che ndãca yune che cahndudó ndudo ndah yahn Dihvo vo Jesucristo, chihnevan ne. ¹⁴Andahre ndãca yune che ndãhchenan nchuhn u yahn che cáh, ate hua din ne, nde hua chacondãh vedame ne u. Tahque ndah ne, nevahnecun ne u, ndihche ne u anduhneçã ndete che ama ángel yahn Dendiohs u mã, anduhneçã mã Dihvo vo Jesucristo u mã. ¹⁵¿A chinã nchuhn vedeyahino che chahtenan cuma ne nducó ro menã me ne? Ama ndedecadino ne yahn cah che quenã ndutinã, nde a rino ne che tico ne ndutinã ne, te ne u. ¹⁶Mã ne, çã racondãh vedame nchuhn u yahn che riyãhvẽ nchuhn che cuahtechica ne nduhcã che nahn Dendiohs ne?

¹⁷Sahn che tihca rinun se nchuhn ne, ndiyu che yahino se nchuhn, te yahn che nahn se che cuacondah vedame ne nuhn, nevahnecon ne sahn. ¹⁸Codin nun ino nchuhn, codin ne che ndah cuahn dama, ndiyu deman cuahn che quenun van ne. ¹⁹Daya che yahino nchuhn, ama rechuhrihn che rendedecadinó cava nchuhn, ne quendi chuhrihn nde nda ro che conan dinahn ne ndudo yahn Dihvo vo Jesucristo nduhca che redin yahn. ²⁰Ama nahn ndete che a quenun van nchuhn, ne cacuahn nchuhn nduco rino nduco ndah cava che conahn ne, te ama rendedecadinó cava ne.

Ejemplo yahn Agar nduco Sara

²¹Nchuhn che nahn nevahnecon ne ley che dirun Moisés, ¿a renahn ne nducuahn che rihquentiyon ne? ²²Nan ley min ne, ndirun che Abraham ne, ndaca o daya ye. Ama se ne, chacoyahn tahn decahya yahn ye che ndere quenah ye nduco te, ne tama se ne, chacoyahn ihyan ndahta yahn ye. ²³Tahn decahya yahn ye ne, ndaca daya te yahn che din chihyo ye tahn. Ate ihyan ndahta yahn ye ne, ndaca daya ye yahn che a tihca necah Dendiohs ndudo yahn ye. ²⁴⁻²⁵Che tihca chi ne, covahn ama ejemplo che tuhca conahn: Nduh che o ihyan ndahta chahn ne, anduhneca o ndudo che chihco Dendiohs. Agar, tahn decahya che ndere quenah te nduco Abraham ne, anduhneca ley che cah Dendiohs Moisés min Cuete Sinaí, nación yahn Arabia. Ihyan yan Jerusalén man, ihyan chenahn man, che renevahnecon ca ley min ne, anduhneca sahn decuah deman che chacoyahn tahn min, che rihquentiyon ihyan sahn. ²⁶Ate uvo che ritahno vo Dihvo vo Jesucristo ne, hua tihchan vo, te quenah cuma che cuahtenan vo vahchetero. ²⁷Tihca, te a ndirun nan Ndudo yahn Dendiohs tuhca:

Di che hua rendaca daye, che nde hua devene deh che renah yah chete ndahta che racoyahn ye,
co yene, nde tuno cuah yene,
te tahque yahn daya ndahta deman
che co ndahta che va inchahn ye.

²⁸Dihno, uvo ne, anduhneca Isaac, daya Sara, ihyan min che a necah Dendiohs ndudo yahn ye che va che cuhndeyan ye. ²⁹Cuedevano ne te ro menan me ne, sahn che chacoyahn tahn decahya che ndere quenah te nduco Abraham ne, din tan

se nduco sahn dayá Sara, sahn min che cah Vaco Ndah yahn Dendiohs fuerza chaco se che ndaca ye sahn. Atihnoçá man ro cuh, te ihyan che renevahneçun ca ye ley che dirun Moisés ne, redin tan ye nduco uvo che ritahno vo Dihvo vo Jesucristo. ³⁰Ate dehve din yahn chemin, te a ndirun nan Ndudo yahn Dendiohs tuhçá: “Cuacondah vedame tahn deçahya me nduco sahn dayá te.” Atihnoçá ihyan che renevahneçun ca ye ley che dirun Moisés, te hua co cuande ye van ihyan yahn Dendiohs. ³¹Dihnó, nducote tihçá ne, cuedevano ne te uvo ne, anduhneca dayá Sara, ndiyu nduhçá dayá tahn deçahya me.

5 ¹Dihvo vo Jesucristo ne, a ndedevahn ye uvo. Man ne, ametah nahn che cah rihn man vo uvo, quendi vo costumbre ndico che nevahneçun vo ro menan.

²U Pablo ne, riyahvé nchuhn. Cuihcovan ne che çahmá. Ndete che cuahneçun ne che conan seña nchuhn ne, nde hua cochihve yahn ne che chitahno ne Dihvo vo Jesucristo. ³Namin ráhn rí nchuhn tama yune te ihyan che cuahneçun ye che conan seña ihyan ne, quenan cuma che dinahn ye nducuahn che rihquentiyon ley che dirun Moisés. ⁴Duh nchuhn che rahco ne che ndeva Dendiohs nchuhn yahn che redinahn ne ley min ne, a chacondah vedame ne Dihvo vo Jesucristo man, a denda ne, te metah yahino Dendiohs nchuhn man. ⁵Uvo, nducote ritahno vo Dihvo vo Jesucristo man, nducote quenun Vaco Ndah yahn Dendiohs uvo man ne, çenan ino vo che ndeva Dendiohs uvo. ⁶Che ritahno vo Dihvo vo Jesucristo ne, hua rignonun chihve a çenan seña uvo, o hua. Che rignonun chihve ne, che cotahno vo ihyan min man, cuahtenan cumo vo vedeyahino man.

⁷Ro menan me ne, ama ndahçá dinahn nchuhn vederihquentiyon yahn Dihvo vo Jesucristo. Man ne, ¿duh rinun nchuhn che cuacotañ ne? ⁸Dendiohs, ihyan min che tendahnun ye nchuhn ne, a ndero ndi che ndiyu ihyan min din ye che ndacorune vederendedecadino yahn ne. ⁹Cuedevano nchuhn te ndudo yahn sahn min che rinun se nchuhn ne, anduhneca tahsihn ya che rendih van nducuahn yache. ¹⁰U ne, quenan inó Dihvo vo Jesucristo che din ye che quendi nchuhn ndudo che chicuáñ nchuhn. Me adecoduhno sahn min che rinun se nchuhn ne, va che din Dendiohs castigo sahn.

¹¹Dihnó, u ne, hua rihquentiyón ihyan che conan seña ihyan, quendi ye ley che dirun Moisés, te ndete che tihcā redín ne, ihyan nación yáhn nde hua din t̄an ye nducó m̄an, nde hua co t̄an ye che rahndudó che quenan yah Dihvo vo Jesucristo nan cruz cava nducoyaco vo m̄an. ¹²Sahn che vatechica se rinun se nchuhn che conan seña nchuhn ne, tahque ndahcā che ama yune no cahca nduh se sahn.

¹³Me nchuhn dihnó ne, a din Dihvo vo Jesucristo che vatemān ino ne. Ametah va che cah rihn ne nchuhn, dinahn ne che rihquentiyon ley ndico me. Ate hua ndedecadino ne che nducote a vatemān ino ne ne, co cuahtechica ne vedeyeno yahn m̄an ne, cuahtendihco ne nunde. Tahque ndah ne, numacuahn vedeyahino cuinan ama tama ne vih, ¹⁴te vederihquentiyon yahn Dendiohs che menān vihca ne, tuhca: “Codin yahine nducoyaca ihyan nduhcā che yahine man di.” ¹⁵Ate ndete che van m̄an nchuhn condinun condinahnō ne vih ne, cuihco ne cudado, te denān co ndache nducoyaca ne, ne din vi ama tama ne yahn vih.

Vaco Ndah yahn Dendiohs ne, rihca t̄an che quendi vo vedeyeno yahn m̄an vo

¹⁶Ráhn rí nchuhn che dinahn ne vederihquentiyon yahn Vaco Ndah yahn Dendiohs cava che hua ndaca yune che cuahtechica ne vedeyeno yahn m̄an ne, cuahtendihco ne nunde, ¹⁷te nduco chemin ne, recah ndache ne Vaco Ndah yahn Dendiohs. Chemin che hua ndahcā che cuahtechica ne vedeyeno yahn m̄an ne, cuahtendihco ne nunde. ¹⁸Ndete che recah yune ne che rihquentiyon Vaco Ndah yahn Dendiohs nchuhn ne, ametah quenān cuma che dinahn ne vederihquentiyon yahn ley che dirun Moisés.

¹⁹A ndero ndi ihyan che vatechica ye vedeyeno yahn m̄an ye, rahtendihco ye nunde, te ndere rahtechica ye nduco ihyan che hua nihnevaco nduco ye m̄an, redin ye dehtenduh che chihnga m̄an, metah vedecuihno nan ye m̄an, ²⁰rendeva ye yavenān dehtenduh che ndere redin ye dendiohs yahn ye m̄an, redin cuah ye m̄an, rendihche t̄an ye vih m̄an, rahte canda ye nduco vih m̄an, redin dihta ye m̄an, ri t̄an ye m̄an, redin cheche chedave yahn ye nduco ihyan chenahn m̄an, rihco canda ye van ihyan m̄an, ²¹redin ve ye m̄an, rihno ye vih

man, rahtechica coh ye man, a cudado che reh no ye vate ye man, a ndeh nan ca nunde chemin chan rahtendihco ye man. Ndaconan riyahvé nchuhn te nducoyaca ihyan chemin chan ne, hua nedin yahn Dendiohs ihyan.

²²Ate ihyan che recah yune ye che rihquentiyon Vaco Ndah yahn Dendiohs ihyan ne, tuhchan ye: Chenan cuma ye vedeyahino man, vedeyeno man, ndahca chenan ye nduco ihyan chenahn man, chahtino ye man, ndah ihyan ye man, redinahn ye ndudo yahn ye man, ²³necun ye man, hua riquendi ye vedeyeno yahn man ye, rahtendihco ye nunde man. Ihyan chahn ne, rihquentiyon Vaco Ndah yahn Dendiohs ihyan, ne ametah quenan cuma che dinahn ye ley che dirun Moisés. ²⁴Ihyan chahn ne, a yahn Dihvo vo Jesucristo ihyan, ne ametah riquendi ye vedeyeno yahn man ye, rahtendihco ye nunde. ²⁵Nducote a ndacorun Vaco Ndah yahn Dendiohs vederendedecadino yuhn vo, ndo vo anduhneca ihyan ra ne, nahn che nan nducuahn che redin vo ne, din vo nduhca che nahn. ²⁶Hua din yahn che din cun vo man, din ve vo man, ndaca yune che co tan ama tama vo nduco vih.

Nduhca che nahn che cuahtechico vo

6 ¹Dihnó, ndete che ama cha ihyan van nchuhn denan condihco ye nunde ne, nchuhn che redinahn ne vederihquentiyon yahn Vaco Ndah yahn Dendiohs, coyahve ne ihyan nduco rino nduco ndah cava che nto ino ye nunde min, ndaca ye vederenchahco. Nahn che ama ndah cahco ama tama ne cudado, te denan nduco ne condihco ne nunde. ²Cuinan ama tama ne vih, te tihca rihquentiyon Dihvo vo Jesucristo. ³Ndete che rahco ama cha nchuhn che ama rignonun chihve ne cuahn che hua cuaco ne, rihncheh man ne nchuhn. ⁴Quenan cuma che ndedecadino queri ama ne yahn dehtenduh che redin ne, hua rendotenan che cua cuande ne ihyan chenahn. Me ndete che runecade ne ne, va deh cuande che co yeno ne. ⁵Tihca, te queri ama ihyan ne, cah rihn man nunde yahn ye ihyan.

⁶Ihyan che rahn ye ndudo ndah yahn Dihvo vo Jesucristo ne, nahn che dama co ye nduco ihyan ricuahn yahn ye, din ye dehtenduh che runecade.

⁷Hua co nchuhn chevah ca tundo, ndedecadino ne che co cahnceh ne Dendiohs, te tuno ca nunde yahn ihyan ne, a

tihçá va che nedihve ye. ⁸Ndete che cuahtechica ye vedeyeno yahn mán ye, cuahtendihco ye nunde ne, va che conda ye. Ate ndete che dinahn ye vederihquentiyon yahn Vaco Ndah yahn Dendiohs ne, cuahtenan ye vahchetero numacuahn ro. ⁹⁻¹⁰Chemin che quenán cuma che numacuahn chedave yuhn vo din vo che ndah nduco nducoyaça ihyan, menán vihca nduco ihyan che ðama ritahno vo nduco ye Dihvo vo Jesucristo, te ndete che tihçá din vo cuahn ðama ne, ndeva Dendiohs uvo.

¹¹Condihche nchuhn nduhçá che a ndero ndi che ama rahte letra redirun mán yahn ne. ¹²Sahn che redin se fuerza nchuhn che conan seña nchuhn ne, tihçá redin se, te nahn se che quendáh yavenán se nan ihyan nación yahn Israel mán, hua nahn se che din tán ye nduco se yahn che rahndudo se che quenán yah Dihvo vo Jesucristo çavo vo mán. ¹³Sahn chahn ne, chenán seña sahn, ate hua redinahn se nducuahn che rihquentiyon ley che dirun Moisés. Che nahn se che conan seña nchuhn ne, atenán çava che din yáde se che sahn chahn chihquentiyon se che conan seña nchuhn. A chemin che vedeyeno yahn se. ¹⁴Ate u ne, atenán che chih Dihvo vo Jesucristo, quenán yah ye nan cruz, ndedevahn ye u ne, a chemin no che vedeyeno yáhn, te nduco chemin chihcomán che quechicá vedeyeno yahn mán, quendihcó nunde. ¹⁵Uvo che ritahno vo Dihvo vo Jesucristo ne, hua dehve din yahn a chenán seña uvo, o hua. Che rigonun chihve ne, che ndacorun vo vederendecadino yuhn vo, ndo vo anduhneca ihyan ra. ¹⁶Nducoyaça ihyan che redinahn ye vederihquentiyon cuh mán, ihyan chenahn che namin ndi cuande ye van ihyan yahn Dendiohs mán ne, ricá Dendiohs che din yahino ye ihyan, din ye che ndahçá cuahtenan ye.

¹⁷Che cuahn ca ne, ametah náhn che denduh nde ama nchuhn u nduco vedetundo yahn ne che ritahno ne yahn sahn chahn. Cuedevano nchuhn te che chenán muhn chenán min yato u ne, a yahn che redín ntiyon yahn Dihvo vo Jesucristo.

¹⁸Dihnó, Dihvo vo Jesucristo din yahino ye nducoyaça nchuhn. Tihçá co.